

# حفنة نور

حواديت شعرية

لشاعر الحواديت/

محمد فهمي عرفة

دار روعة للطبع والنشر والتوزيع

"حفنة نور"

شعر

محمد فهمي عرفة

الطبعة الأولى 2013

دار روعة للطبع والنشر والتوزيع

المدير العام : هبة الشرفاوي

موبايل : 01140178144

**darrawaa@yahoo.com**

رقم الايداع /2013/5319

الترقيم الدولي

978-977-6411-27-2

إهداء

إلى من أحب

.

.

.

حفنة نور إلى ..

نور حياتي ..

ابني /

يوسف محمد فهمي



قالوا عن الشعر ..

- إذا لم يجيء الشعر طبيعيا كما تنمو الأوراق على  
الأشجار  
فخير له ألا يجيء.

بقلم: كيتس

- الشعر علم دقيق شأنه شأن الهندسة تماما

بقلم: فلاوبرت

- حتى عندما يكون للشعر معنى فمن الأفضل الا  
تستخرجه كله

بقلم: هاوسمان

- هذا ليس شعرا .....إنه نثر مجنون

بقلم:بوب

- النثر: هو كلمات في أجمل نظام  
الشعر: هو أجمل الكلمات في أجمل نظام  
بقلم:كولريديج

- الشعر هو سجل لأروع الدقائق وأسعدها في أسعد  
العقول وأروعها  
بقلم: تشلي

- سيدي..... ماهو الشعر؟  
من الأسهل ياسيدي ان أصف لك ماليس بشعر  
بقلم: جونسون





## فاهم و لاّ مش فاهم ..

كتبت كلام ..  
و مفهمتش ..  
عن معركة ..  
و حكاية متفبركة ..  
شغل بولوتيكيا ..  
و تكتكه ..  
و لو واحد جالك ..  
و إشتكى ..  
قولوا له الواد ده ..  
منعرفوش ..  
و كتبت كلام ..  
و فهمته ..  
عن الصحاب و اللّه ..  
و كرامة الإنسان ..  
و الأمه ..  
و الشجاعة و الهمة ..  
و شكلته ..  
بالفتحة و الكسرة و الضمه  
عن البنى آدم ..  
إعرفوا .. قيمته



## حواديت القبور

(جزء من شعر مسرحية ثورة الموتى)

قالوا ..

وسط القبور حكايات

جوا القبور حواديت..

الحلم فى حياتك قبل الممات!

معقول يتحقق فى التوابيت ??

إن قالوا لك فى يوم..

إظلم يا مظلوم

إوعى تسمع كلامهم..

لا يجيبوا عليك اللوم

قلوبنا الطيبة..

فيها الخير و الشر

إوعى يا مخلوق..

فى ثورتك تغتر

خير .. راح يجيب الخير

رجع لبيت و أسرة .. غير

يوم ما إشتغل جاب فلوس

إتغير .. و إتغيرت نفوس

خير... ..

غربة و شقى الزمان

خير... ..

شرب من كاس..

و إكتشف المسكين

إنه كان ... ..

..

..

قرطاس.

## راجع

أحب فيكى النسمة ..  
أحب فيكى البسمة ..  
أحبك بين ضلوعى ..  
أصل .. و صورة .. و رسمة.

إنتى الأمل ..  
و إنتى القلب ..  
و إنتى الحنان ..  
إنتى الحب إالى إتولد ..  
فى بحور زمان ..  
إنتى القلب إالى عايش ..  
و الحب إالى كان.

قلبى ذى الورد العطشان لقلبك  
ساعة المطر ..  
يشرب من بحور حبك  
و يطير للسحاب ..  
فى السما .. يتمنى قربك.

هافرد جناحى..  
و أضمك بين ضلوعى ..  
أشرب بحور هواكى..  
أروى عطشى و جوعى..  
و أبنيلاك قصر دهب..  
من تعبى و شقايا و دموعى..

مش هأقولك فاكرة ذكريات  
مش هالومك على حب إنجرح..  
مات .. ..  
إنسى إالى فات.

\*\*\*

الحب النهاردة إحساس و شعور  
الحب نجمة بتلألأ نور ..  
الحب يعنى القلب..  
مش إنى أكتب فيكى سطور!!

## حفنة نور

الشعر ما يأكلش عيش  
و أنا عيشتي في الفضفضه  
و القلم في إيدى ..  
منفضه ... ..  
أنفض همومى فى العتمه  
لأجل حفنه نور.

أنا بأعترض ..  
و إعتراضى ليه أوان.  
إحنا فى شهر ..  
ذى كل الشهور  
لكن الشهر ده ..  
طلع مشهور  
و شهرته من شبابه ..  
شهداء فى عمر الزهور

لأجل ما تعيش دنيتك ..  
و تكون إنسان.

ذكريات الشهر..  
غيرنا بيحسدنا عليها  
فيه إالى عاش و مات

و لسه مستتيها.  
حريتك فى الميدان  
و غيرنا بيدور عليها

إحنا فى شهر ..  
يتhez له الوجدان.  
إحنا فى شهر ..  
إتجمعت فيه أحلامنا  
جراحنا فى عز البرد  
تلملمها آلامنا

و غيرنا .. يوم ما غيرنا  
إختاروا حكامنا  
إحنا فى شهر ..  
لقيته فى الميدان.

يناير ٢٠١٣

(بمناسبة ذكرى ثورة ٢٥ يناير)



## الشنطة الجلد

رجعت تانى لنفس المكان

نفس الشارع ..

نفس الزمان ..

إلى فيه مدرستى ..

قعدت أفكر فى السنين

و ياخذنى الحنين ..

شايلى فى شنطتى ..

كراسة و قلم و كتاب

أستاذ و حصه و سبورة

و جرس بيدق الباب

و فسحة حلوة ف مدرستى

ذكريات م الطفولة للشباب

ذكريات ولد صغير ..

نفسه فى شنطة سمسونيت

واخد الدنيا بشقاوته جد

كان رد والدى و الطبع راسى  
و مالها يا ابنى الشنطة الجلد؟  
أقول له عاوز شنطة دبلوماسى  
يقولى و ليه يا ابنى بس العند؟

و يشتري والدى الشنطة  
و إحنا فى رحلة لبورسعيد  
يومها نايـم فى حضنها ..  
مستنى مدرستى يوم عيد  
أغير جلدى من شنطتى ..  
و الشكل أحلى .. جديد

ألم صحابى م المدرسة ..  
فى الشارع ألعـب الكورة.  
و أعمل الشنطة عارضة ..  
و تعدى الشارع عربية  
صغيرة .. فيورا .  
تدوس ع الشنطة و تتكسر  
و إحنا لسة بنلعب .. ..

و نخسر الفوراً.

و يدور الزمن بينا ..

و تلف السنين .. ..

و أبقى .. أنا .. بابا

و والدى .. يبقى جد

وإبنى يقولى .. ..

عاوز شنطه سمسونيت

أقوله .. ..

و مالها يا إبنى الشنطة الجلد؟!

(قصة حقيقية للمؤلف بداية أحداثها عام ١٩٨٤ )

## إعدام ألم

قلب و ألم.....  
مسكت القلم..  
جرحت الألم..  
تركت القلم..  
الجرح إتكتم..  
نسيت الألم..  
مسكت القلم..  
دبحت الندم..  
تركت القلم..  
الألم .. إتعدم.

## الانتخابات

علشان اللقمة تبقى لقمة عيش  
...لازم العجين يستوى ..  
تاكل عيش.

جدار الشقا من العرق يرتوى  
مطحون بين الرحايا ..  
القلب يتكوى ..  
و لازم تعيش.

كل إللى قال على المُحال .. مُحال  
مصر فى عيون شباب .. جُمال  
غيرها ماتلاقيش.

لازم تختشى .. ..  
ما تقولشى مالى و ترتشى  
مصر بتتولد من جديد..  
علشان تعيش.

كل إللى قال .. الغلب دا سكتى ..

المصرى إالى باع وجوده فى إنتخابات

... ..

مايسويش.

## أنا محبش

أنا محبش ..  
إلى بيوعد و لا يوفيش  
و إلى يقولى كلام قراقيش  
...و إلى بيكذب ما يلزمنيش  
و محبش إلى دماغه تعبان.

أنا محبش ..  
إلى بيسقط .. و بيتمايع  
و محبش الشخص الضايع  
و إلى يلاوع شارى و بايع  
و محبش إلى يكون كسلان.

أنا محبش ..  
إلى بيضحك و ضحكته صفرا  
و إلى يقولى كلام بالشفرة  
أولع فيه على ورقة بفره  
و محبش إلى يكون خوان.

أنا محبش ..  
إلى يلف رقبتى فى طوق

و إلی یزاحم من غیر ذوق  
نصیحة یا ابنی .. إصحی فوق  
و محبش شغل العافیة وکلام تعبان.

أنا محبش..  
إلی عایش الدور و بیخدع نفسه  
شحات و برنس علی نفسه  
عایش الوهم من بکره و أمسه  
و محبش تكون فی الصیف سقعان.

أنا محبش..  
إلی بیبع صاحبه عشان بنت  
و إلی واخدها عند فی عند  
و إلی یبرر حبه فی بنت  
و محبش إلی فی حبه جبان.

أنا محبش..  
إلی ما یشکر و یقول ممنون  
و إلی فاکر نفسه شمشون  
خف یا ابنی .. هدی التون  
و محبش إلی عامل فیها کروان.

أنا محبش..  
إلی حیاته قاعد علی قهوة



ماشیه‌ها بالعکس تَضِیع علی سهوه  
إِتْغَطی یا اِبنی بلاش تستهوی  
و محبش تبقی کمان فِتّان.

## الطرف الثالث

فى الشوارع .. فى الحوارى  
الزحمة .. .. زحمتوها

كل طالح .. فى المصالح  
الرشاوى .. .. رشتوها

خير دم الفقراء  
فى الزكايب .. .. عبتوها

العيشة .. و إلى عايشينها  
وع الغلبة .. غليتوها

الفرحة ماتت ع الوشوش  
الضحكة .. صفرتوها

الدمار وسط الزحام  
والوشوش .. خبيتوها

مدحكم كثير .. رياء  
والكرامة .. .. ذمتوها

حتى الرخامة .. رخمثوها  
الإنسانية .. عذبثوها

و إحنا فى الزحمة تايهين  
مع التايهين .. فى التوهه

## ألوان

لوحة حب بأرسمها..  
شفايف فيها شقاوة..  
.. عيون و خدود.

بالفرشة و الألوان..  
فردت شعرك على كتفى  
و يوم موعود.

رتوش و روج ..  
 علم علی خدی ..  
 حب مالوش حدود ..

يوم و التانى..  
شبكة و فرح..  
و بيت فى جزيرة بعيد.

اول طفل يملا حياتنا..  
والله اعلم..  
فرح و عید.

أصحي من نومي

فرحان ... ..  
أنام .. و أحلم من جديد.

## الفارس

(عن مسرحية سيرة الشهيد مارجرس)

مارجرس الروماني هو أحد أشهر شهداء المسيحية وهو معروف ومكرم لدى كلا من الكنائس الشرقية والغربية ، و نظرا لبطولته وشجاعته الفائقة فقد اتخذته العديد من البلاد شفيعا حاميا ورمزا للفروسية والنبل ، و هو من مواليد فلسطين واستشهد في عام ٣٠٣ ميلادية خلال الاضطهاد الذي شنه الامبراطور الروماني دقلديانوس ضد المسيحية واتباعها و إجبارهم على عبادة الأوثان و إنتشار الظلم و الفساد الذي كان يعم الإمبراطورية، و قد تم الربط في العمل الفني بين قصة مارجرس الروماني و الإمبراطور دقلديانوس بديكتاتورية حكام الشعوب و سبب ثورة الشعوب على الحكام الطغاة.

فارس الزمان ..  
و فارد جناحك.  
من اليوم يا سقراط ..  
بأطلق سراحك.

كما الأقفصى .. أنا لفيت  
مهما رحت و مهما جيت  
أنا .. شاعر الحواديت..

إن قلت دا الأمير  
و إيمانه بالرب .. كبير.  
أنا قلت دا الفارس  
و إيمانه بالرب كان .. حارس

بالسلام .. بالأصول ..  
لأجل ما تفهم عقول  
جرجس لما قطع المنشور ..  
دى البداية للكرامة ..  
و دى الإهانة لإمبرا .. .. طوووور.

أمير الشهداء فى إيد ملاعين ..  
بالحبال .. بالمسامير ..  
ع الهمبازين ..  
إفرد جناحك و إنسى الأنين ..

سنين وراها سنين ..  
( سبع سنين )  
شفت العذاب ألوان  
دقلديانوس المجنون ..

حفيد الوهم فى الأوثان

لما الحقيقة تبقى خيال ..  
و الصدق يصبح كذب

لما الرجال تبقى عيال  
و إيمانك يضيع فى عذاب

يبقى فى الصبر ..  
فى الدين ..  
تبقى الحياة بالعكس  
و تتقلب .. الموازين

مهما رحت .. ..  
و مهما جيت  
تسمع اسم الشهيد الكل إنتباه.  
دا مسيحى مخلص للإله  
و أنا .. شاعر الحواديت ..

إنت الفارس .. ..  
ربك حارس

بالسلام .. بالأصول ..  
لأجل ما تفهم عقول



جرجس لما قطع المنشور ..  
دى البداية للكرامة ..  
و دى الإهانة لإمبراطور.

الكل دایر ما یدور  
هاتوا الساحر.

(المجموعة): "بأمر الإمبراطور..."

أثاناسيوس المهوس  
بالسحر الأسود الملبوس  
تعيش .. تموت فى كابوس  
تتكبس .. ..  
تضرب بوز على بوز  
لأن سحرك المنبوذ..  
على إسم الشهيد .. لا يجوز.

فالييسيا ..  
جميلة من جميلات القصر  
قلب المؤمن لو يتعصر عصر

الخطية مش سكتہ..  
و ایمانہ للرب محبتہ.

عقيدته تسكن قلبها ..  
توهب حياتها لربها.

يبقى أمير للشهداء ..  
و بإيمانه بينول النصر.

\*\*\*

جرجس قال لسقراط ..  
من اليوم مفيش عبيد.

لما الخاين فى الميدان ...  
يأمر من بعيـــــــــد.

إضرب ..  
إضرب دول كلاب ..  
عبيـــــــــد.

يبقى مين المستفيد؟؟  
يبقى مين المستفيد؟

شوف ..  
شوف ماتش كورة ..

مات كام شهيد.

من فوق من بعيد..

من بور سعيد..

و لأخر الصعيد.

شوف..

كام منشور للفساد ..

شباب الثورة قطعوه

إلى يقول الحق ..

يخونوه

و إلى يدور ع الكرامة..

يدهسوه

حتى مينا فى ماسبيرو..

موتوه.

شوف..

شوف حياتك ... ..

فين خلاصك.

إنت مؤمن ذى جرجس ..

و لا لسه راكب راسك.

إتعلم م إلی فاتك ..  
إوعی تفقد یوم حماسك .

یاااااااااااه ... ..  
دی الكرامة فی دمنّا  
و العقیده فی قلبنا

و إلی فی حیك و ف حیّا ..  
میختلفش عنّا ..  
دی المحبة فی شعبنا .

بالسلام .. بالأصول ..  
لأجل ما تفهم عقول  
بإیمان .. بصمود ..  
الخير هیعود ..  
لأن دم الشهيد ..  
فی میدان التحریر موجود .

لأن دم الشهيد ..  
فی میدان التحریر موجود .

## تنهيدة....

بحبك..  
يا نجمة تنور طريقى  
...بحبك..  
يا نبض قلبى و عروقى  
يا أم العيون..  
جواهر نعسانين  
و شعرك على كتفى..  
و شفايف عطشانين.  
فى بحور هواكى أسبح أنا  
نعيش الحب سعادة و هنا  
يا أم الخدود وردى ..  
وردى..  
ما تهدى فى خطوتك..  
هدى..  
و ياااه ..  
يا حب فى الوجدان  
يا قلب فياض مليان حنان.  
يا قلب فيه الأه ..  
و تنهيدة..  
تحى ذكريات... ..  
قديم و جديدة.

و أخط إيدي على خدي..  
و أقول يا حب..  
خليك جنبي  
تعالى هنا عدي..  
و أقولك تانى .. ..  
يا أم العيون..  
يا أم الخدود..  
و الشعر الحرير..  
سبايك دهب ..  
بأحبك زمان و دلوقتي  
و بكرة الوليد..  
بأحبك زمان و مكان  
و عهد جديد ..  
و يااااااااه .. ..  
و تنهيدة.

إنتى مين؟

أنا فى طريقى ..  
كل خطوة ممصوفة ..  
ممدوغة فى سكة العاشقين  
أنا إالى تعبت و شقيت ..  
أنا إالى عرفت طعم الطين  
أنا إالى بين الرحايا ..  
مع المظلومين ..  
المطحونين ..  
شربت من نيلك ..  
و عيشت على أرضك ..  
و مش لاقى نورك إالى بينقطع  
باليوم .. و اليومين ..  
إنتى مين؟  
خطوتك شمس الطريق ..  
و أنا فى الخيال ..  
فى الزحمة ..  
فى سكة العاشقين ..  
إنتى مين؟

## شارد

شارد ..  
فى حبك أنا شارد ..  
و فى قربك ما بتكلمش.  
قلبك جوا قلبي ..  
و غدر الحب ما بيرحمش.  
بأكون زعلان و أكون شارد ..  
و أرجع فى حبك أنا شارد.

شارد ...  
فى حبك أنا شارد..  
ولسه النبض فى القلب.  
بيقول بحبك يا .....  
و الأمل فى قربك صعب.  
يعدى الزمن و أكون شارد ..  
و أرجع فى حبك أنا شارد.

شارد ..  
فى حبك أنا شارد ..  
قررت فى قربك أتكلم.  
علشان الحب بينا يدوم ..  
و من خيال لحقيقة أتعلم



يكون الرفض و أكون شارد  
و أرجع في حبك أنا شارد.

## طموح

شق الطريق ..  
إمشى ما تخافشى .  
فتح عيونك ..  
خليك نشيط ما تنامشى.  
بص فوق للقمرة ..  
ترسم لك ضحكاية.  
تخلي الأمل يتحقق ..  
تبقى ذكرى و حكاية.  
بص تلاقى نجماية ..  
قاعدة مستنية.  
يوم ما تفقد حب ..  
تلاقى حنية.  
لسة الأمل بينادى ..  
بيقول يا محمد.  
إوعى طموحك يغلبك  
يخليك تتجمد.  
شق الطريق ..  
إمشى ما تخافشى .  
فتح عيونك ..  
خليك نشيط ما تنامشى.

## أنا المصرى

ع النايات .. ..  
بأكتب و أقول حكايات ..  
و علشان ملفش و أدور ..  
و تطول بينا حوارات ..  
إلى عايش ع المهانة ..  
و إلى قادر ع السكات ..  
مالهوش مكان ما بينا ..  
دا فى عرف الثورة .. مات ..

إتمحى من كل الوجود ..  
إنك تشوف مصرى يعود ..  
يبقى عايش عالبلادة ..  
و إيه إلى يصبرك ..  
ع البلا ده ؟؟  
تاكل الزل ..  
و الغير وجود ..  
زمن السكات .. مات ..

العاطل ..  
ع القهوة عاطل ..  
فى الطاولة و الكوتشينة ..

أستاذ .. و بيه.  
عاوز يشتغل ..  
ياكل .. يعيش ..  
هو الفقر ماسك فينا أنجيه؟؟  
الشهيد .. ربنا رحمه ..  
طب الجعان؟؟  
و المريض؟؟  
ما ترد؟؟ !!!  
مستغرب من سؤالي ليه؟؟  
حاجة بجد تغيط ..  
بس اللذيذ .. ..  
إنك تلاقى الناس ..  
لسه عايشه ، و بالمعايشه ..  
الفقر يصبح صديق.  
مش قلت لكم ..  
حاجة بجد تغيط.  
كل ده و جاى بتسأل:  
إنت مين؟؟  
إنت فاكرك .. تسأل أجاب  
تأمر .. أقول أمين؟؟  
إحنا الشقيانين ..  
التعبانين ..  
المطحونين ..  
إلى من جهلكم ..

قولتوا علينا مأجورين.

أنا مش حزب ..  
أنا .. لا سلفى ..  
و لا إخوانى ..  
لا أنا ليبرالى ..  
و لا علمانى.  
أنا الحقيقة ..  
أنا الحقيقة من شرقها لغربها ..  
من شمالها للصعيد الجوانى.

هو عيب ..  
أكون حضارى و عصرى؟  
هو لازم نتكتم ملناش رأى ..  
و الجهل فى عروقنا يسرى؟  
بأقولها .. و يعلا صوتى ..  
زمن السكات .. مات ..  
أنا المصرى ..  
أنا المصرى.

## مّوال ..

أنا عمري عشته بأتعلم  
فى كل خطوة أتعذب اتألم  
عرفت إن البشر نوعين  
ذى الأبيض و الأسود لونين  
الأول يصيبة اليأس و يسلم  
و الثانى من عذابه يصمد و يتعلم

=محمد فهمى=

١٩٩٢

## الكاشير ..

كنت صغير ..  
فى المدرسة ..  
و كنّا عيال.

بأتعلم أكتب إسمى ..  
حرفين .. و التالت ..  
و الرابع دال.

كنا نكتب ع السبورة ..  
كنا نشخبط بالطباشير

يوم بأتفنن أرسم صورة ..  
و يوم بالضحك مفيش تكشير

إتعلمت .. تعبت .. سافرت ..  
و كترت .. كترت المشاوير

يوم وراء يوم نكبر .. نكبر ..  
أحلم أبقى من المشاهير

سنين و سنين بتعدى..  
و فى آخر الحلم..  
لقيتني ... .. كاشير.



## حبيبتى يا مصر

أغزل من قوافيكى ..  
غزل .. ..  
يملى الدنيا فيكى ..  
و ألف الدنيا بيكى ..

حبيبتى يا مصر  
الميم .. محبة ..  
و الحب دا ..  
من عاشق ولهان  
الصاد صراحة ..  
و حياتى فداكى ..  
كما الفرسان  
الراء .. راجع ..  
لحضنك الدافى ..  
و أكون لك أمان

## الشای .. (مّوال)

حبیبتی قالت .. تعالی عندنا إشرّب شای

(شای)

قلت یا حبیبة .. ما أقدرشی أشرب شای

(شای)

أصل طبع الهوی ما یجوزشی علی شای

(شایب)

لازم أكون صغیز خلیوة .. مش شای

(شایب)

قالت مهما طالت الأيام فی عیونی شای

(شاب)

نعیش أحلامنا علی قلوبنا ندوب فی شای

(شباب)

قلت لیه نحلّم ما دام هوی قلبك أنا شای

(شایف)

علشانك أكسر جبال و علی كتافی شای

(شایل)

هابنيلك قصر ذهب و هأكون لك الشای

(الشباب)

## مطلوب القبض عليه ..

لو سمحتوا ..  
لو لمحتوا ..  
الشخص ده ..  
مطلوب القبض عليه  
يكتب لنا كلمتين ..  
عن قلب عطشان للحنين  
و لو لقيتوه ..  
إوعوا تنسوا تبلغوه  
إنه واحشنا من سنين.

لو سمحتوا ..  
لو لمحتوا ..

.

.

## فاكرة ..

لَمَّا كَانَ الْقَمَرُ طَالِعَ ..  
مَاشِيِينَ نَتَكَلَّمُ ..  
بَصَيْنَا لِلسَّمَاءِ ..  
النَّجْمَةَ جَنْبَ النَّجْمَةِ ..  
مَنْ حَبِيْهِمْ نَتَعَلَّمُ  
قُلْتُ إِمْتَى يَوْمَ فَرَحْنَا ..  
وَالكَلَامَ خَدْنَا وَإِتْقَدَمَ.

قُلْتُ فِي هَمْسَةٍ مِنْ حَنَانٍ  
إِنْ حَبِي لِيكَ مَوْجُودٌ ..  
وَمَهْمَا طَالَتِ الْأَيَّامُ ..  
حَبِي لِيكَ مَالُوشْ حَدُودُ  
وَالْأَمَانِي الْحُلُوةَ بَيْنَنَا ..  
هَنَحَقِّقُهَا بِعِزِّمْ وَصُمُودِ.

كُلُّ دَهْ وَالْقَمَرُ مَنُورٌ ..  
وَاللَّيْلُ جَمِيلٌ بَيْنَ الْمَزَارِعِ  
وَكَمَانٌ جَمِيلٌ جَوْهَ قَلْبِي  
وَبَيْتُنَا الْكَبِيرُ ..  
وَجَنِينُهُ وَشَارِعُ.

و لسه ماشيين ..  
و الايد جنب الايد ..  
بينهم مانع.

كنت خايف يوم و تنسى ..  
حب كبير شلته فى قلبى ..  
علشان كده إتكلمت ..  
و كان الحب مستخبي  
و لسه القمر طالع منور  
يشهد على حبك و حبى.

فاكرة ..  
يوم ما كنّا فى عربية صغيرة  
قاعدين و القلب للقلب  
نسمة شاردة عدت ..  
حركت بينا الصعب  
شايفه شمس الغروب؟؟  
قلتها لك مداعبة حب.

فاكرة ..  
لما كان هناك مانع ..  
و الايد جنب الايد خايفة  
النهاردة الحب إنتصر ..  
و قلوبنا شاهده و شايفه ..

جای میعاد رحیلی ..  
مشیت بعید ..  
و قلبك دمعته بتقول كفاية.

مش هاقولك ..

عارفة ..  
إمتى أقول بحبك؟  
إمتى أكون بدوب فى حبك؟  
مش هاقولك ..

مهما حاولتى تكونى جنبى ..  
ليل نهار ..  
أو تكونى نسمة حب ..  
مع التيار ..  
مش هاقولك ..

إنتى فاكرة إنى أقول بحبك ..  
لعب ..  
ولا أقول هفضل فى قربك ..  
صعب ..  
مش هاقولك ..

عارفة ..  
إمتى أقول مسلّم؟؟  
إمتى قلبى يقول .. يتكلم؟

مش هاقولك ..

لو حاولتى .. أو هربتى  
أو من شوقك .. إنتحرتى  
مش هاقولك ..

إنتحرتى؟ .. إنتحرتى؟ ..  
لا .. هاقولك ..  
كله إلا الموت .. بحبك.  
لا .. هاقولك ..  
إنى بدوب فى بحر حبك.  
=محمد فهمى=



## لحظة فراق ..

و مهما تفرق بينا الظروف ..  
لا بد فى يوم نتجمع ..  
أمسح دمعة زعل و خوف ..  
و بأيدينا نبني و نزرع ..  
الحبه تبقى شجرة ..  
و إنتى تبقى الأم ..  
أولادنا يبقوا الثمرة ..  
و الخير علينا يعم.

و مهما تفرق بينا الظروف ..  
دايماً قلبى مش ناسيكي ..  
بس إمتى يوم أشوف ..  
مفيش كسوف فى عنيكى ..  
كلمة بحبك على لسانى ..  
بس فىن الآقى قلبك ..  
لازم أتحرك أسيب مكانى ..  
أكون جرى .. أقول بحبك.

و مهما تفرق بينا الظروف ..  
يوم لقانا مش بعيد ..  
أبنيلك قصر بالوف ..  
و نعيش فى حب و عيد ..

قلبك .. هو قلبي ..  
و نعدى المشوار فى سكون ..  
حبك .. يبقى حبي ..  
و لا لحظة فراق بتهون.

## سنين العمر ..

يا سنين العمر ..  
لا تعدّى ..  
هدّى فى خطوتك ..  
هدّى ..  
العمر ليه بيجرى ..  
و الطريق مشوار ..  
الحزن ليه ما بيجرى ..  
و القلب فيه إحتار.

يا سنين العمر ..  
لا تعدّى ..  
هدّى فى خطوتك ..  
هدّى ..  
أبكى عليك يا زمن ..  
ولّا أبكى ع اللى راح ..  
دموعى دايماً محن ..  
مكنتش يوم أفراح.

يا سنين العمر ..  
لا تعدّى ..

هَدَى فِي خَطْوَتِكَ ..  
هَدَى ..  
قُلُوبَ كَثِيرٍ مَجْرُوحَةٍ ..  
و الجرح فيها طال ..  
إِمتى ما الأَقَى جَرِيحَةٍ ..  
أَوْ جَرِيحٍ لِلْحَزَنِ شَالِ.

يَا سَنِينَ الْعَمْرِ ..  
لَا تَعْدَى ..  
هَدَى فِي خَطْوَتِكَ ..  
هَدَى ..  
أَمَانَةً عَلَيْكَ يَا سَامِعَ ..  
تَكُونُ صَدِيقًا وَ تَشُوفَ ..  
أَيَّ خَطَأٍ وَ تَمَانَعَ ..  
وَ تَحْذَرَ الْمَلْهُوفَ.

## بريد الأحبة ..

يا قلبى يا حيران ..  
ليه مشغول بيها؟  
دايماً أفكار تجيبها ..  
و توديتها ..  
يا سحابة فى الهوا ..  
شيلى قلبى ..  
طيرى فى السما ..  
إبعثى حبى ..  
و إنزلى على خدين ..  
لولى وردى ..

قولى للقمرين ..  
رسالة من ولهان ..  
بلاغى الرد يكون الحد ..  
و لسه حيران ..  
سبت و حد .. ..  
و أنا ع الباب نشوان ..  
إزاي يا سحابة ..  
تعطلى البريد؟؟  
دا إحنا فى بابيه ..

مش فى العيد ..  
يوم و الثانى ..  
و أبعت من جديد.

حقق لى الأمانى ..  
يارب السما و الأرض ..  
إحفظ رسالتى ..  
و حرك قلبها بالنبض ..  
تعرف حيرتى ..  
و أخيراً يوصلنى الرد.  
حبنى .. قلبى ..  
إنت عمرى ..  
مع إشراقة شمس ..  
إنت جنبى ..  
يا رياح المحبة ..  
إرسلى له حبنى ..

سلام و تحية ..  
لكل نسمة هوا ..  
شاركت بين قلبين ..  
حبايب حبايب سوا ..  
شكراً يا رياح ..  
رسالتك فى الحب دوا ..  
أثقل ع الجنين ..

فرحان متهنّى ..  
أفتح عين ورا عين ..  
وزعلت عصب عني ..  
أمي بتقول بإيديني ..  
إصحي يا مجننى ..

بصيت للسما ..  
أكرر قصتي ..  
مع سحابة وهوا ..  
يمكن ترجع فرحتي!!

مارس ١٩٩٠

## باكتب لك ..

باكتب لك يا أمى ..  
باكتب لك ..  
جواب على الورق بدمى  
أول كلامى ..  
سميت بربى .. "بسم الله" ..  
و بعد سلامى ..  
بأقول لك من التعب .. آآه  
باكتب لك ..  
من غربه بعيدة ..  
و طالت سنين  
باكتب ...  
و شوقى فياض بالحنين  
باكتب لك يا أمى ..  
قصة حياتى ..  
محفورة على جدار الشقا  
جنبها شريط زكرياتى  
من بعيد  
متسجل يوم بيوم ..  
من قديم لجديد ..  
باكتب لك ..



و أنا تعبان ..  
شقيان بدراعى  
باكتب .. و باشكيلك ..  
بالجملة و القطاعى  
و فى آخر الجواب ..  
بامضيلك .. و بادعيلك  
أنا الشهيد على أرضك  
جأى لك ..  
شدى حيلك  
=محمد فهمى=

## رغم الحب ..

مش راح أندم ..  
رغم دموع عنيه ..  
مش راح أندم

أنا كنت طير ..  
فى مهب الريح  
دلوقتى إتقتلت ..  
و قلبى جريح  
مش راح أندم.

إنتى إالى كنتى ..  
حب كبير  
بقيتى حزن ..  
فى قلب ضرير  
مش راح أندم.

أنا و إنتى ..  
إلى كنا كيان  
ليه تبعدى ..  
دا أنا إنسان

مش راح أندم.

هأفضل أقولها ..  
و أنا مقتول  
رغم الحب ..  
إلى كان هيطول  
مش راح أندم.

دا مهما طالت الأيام  
و دموعى تمسح الأحلام  
مش راح أندم.

## حكاية محكمة تجارية ..

- فى منتصف الثمانينات بدأت براعم الهوايات الفنية فى الظهور من أول الرسم بألوان مائية و كتابة خواطر شعر و قصة قصيرة .. و لأننى كنت لا أحب المواد العلمية الجامدة الخالية من الفكر و الإبداع الفنى .. قررت فى معظم مراحل الدراسة أن أكتب شعرا فى القوانين العلمية أو الرياضية حتى يسهل حفظها .. و عند الإمتحان أسترجع القصيدة من ذاكرتى لأضع القوانين العلمية و ترجمتها فى ورقة الإجابة بالطريقة الجامدة و الجافة .. و نجحت فى الدراسة بهذه الطريقة الغريبة.

و كانت هذه إحدى ثوراتى الخاصة على العلم أو المواد الدراسية التى لم تكن تتناسب مع موهبة او هواية أرغبها من وجهة نظرى وقتها ..  
إلتحقت بكلية التجارة - الكلية الشعبية الأشهر - ( مش بمزاجى طبعاً .. مجموع و تنسيق و حركات ) و حتى أهرب من المواد الرياضية و الحسابة تخصصت فى إدارة الأعمال .. و كنت مصراً بينى و بين نفسى على تحويل المواد العلمية و المحاسبية إلى حواريت شعرية ..  
داخلها القوانين العلمية .. و تشاء الأقدار بعد التخرج أشتغل فى شركة سياحة و فى الإدارة المالية ( كاشير ) .. مفيش فايدة ☺

إفتتحت الجلسة ..  
قالها "القانون" مين أكبركم ممارسة؟  
"المحاسبة المالية" كبير العيله رفع إيده  
أنا الكبير - ولا فخر - لا يكدنى كتاب و لا أكيد  
مهمتى .. أشبع حاجة الفرد ..  
و منشأتى فردية بالطول و العرض  
علاقى طول السنة بينى و بين الغير  
أقيد و أجرد سنوياً .. ما أغير خط السير  
رد "القانون" و بصوت جهورى على  
و فين باقى العيلة؟ يا "مالية" قَرَب تعالالى  
وقف الإبنين الكبار هرمين شامخين  
سألهم "قانون" قالوا إسمنا "القطاعين"  
رد واحد قال .. أخويا "الخاص" بشركاته  
و أنا بأتعَدِّل من "عام" لقابضة و تابعة مراته  
و دى أختنا "حكومية" صاحبة مبادئ و أسس علمية  
مرة تعمل موازنه .. و مرة تلغى مديونية  
أصل هدفها تحقق الخطة العامة للدولة

رد "القانون" ..

و إيه يعنى أنا بشركاتكم عندى مقاوله  
خلصنا يا سيدى .. و فى بقية العيلة  
دخلت "تكاليف" و فى إيدها كشوفات شيلة  
قعدت تقيس و تحدد تكلفة إنتاجها  
بتجميع و تبويب و تحليل عناصر تكاليف بتروجها  
.. قالت ..

عناصرى بوحدة المنتج ..  
مباشرة و غير مباشرة  
و بحجم النشاط ثابتة أو بتغير ..  
حسب ما تكون العشرة  
"الإحصاء" قامت .. و بعد تحية و سلام  
يا "قانون" يا بيه .. ده اسمه كلام  
سايب عيلة "المحاسبة" بتقول و تحكى  
و إحنا بقية الكتب زهقنا و أدينا بنشكى  
سأل "القانون" يعنى إيه؟ .. أعتبرها قضية؟  
ضد عيلة المحاسبة إالى بينهم مدام "حكومية"  
أيوه قضية ..

داكل واحد يقوم يتكلم .. يشمرلى دراعة  
طالب فاهم و الثانى لأ .. أخذ الكتاب باعة  
أصل الحكاية عاوزه فن ..  
عاوزانى فى الصورة  
أفرض فروضى و أصدر قراراتى ..  
ده علم مش كورة.  
هاج "القانون" قام وقف و أعصابة ثائرة  
مين هنا يصدر قرارات غيرى ياللى سينك بايرة  
و ضحكت "الإحصاء" ..  
لما شافت الجهل فى إالى صار  
قالت ..  
مجموع القيم على عددها إسمها سين بار  
المناقشة بين الكتب ..  
فى المحكمة شدت  
و بكل سلاسة و حكمة ..  
قامت "علاقات" هدت  
تنشر الود و التفاهم و الفهم بينهم  
"الضرائب" غمزت ..

يا "علاقات" سييك منهم.  
الخلاف بينهم لازم يكون موجود  
علشان أميز الصح من الغلط محدود  
قال "القانون" ..  
طبعاً علشان يكون ليّ لازمة  
أصدر حكمي بالعدل و أحل أى أزمة  
"اللغات" وقفت .. يا جماعة Silence  
ليه هاييجن عملينها حفلة Dance  
ليه مش بينكم Confidence  
"الضرائب" قالت .. ليلتنا كده أنس  
أنواع ضرائبي أربعة أولها نوعيه  
إللى مصدرها العمل ..  
مرتبات و مهن غير تجارية  
و رأس المال مع عمل ..  
في الأرباح الصناعية  
و إللى مصدرها المال ..  
ضريبة قيم منقولة  
و فيه أطيان زراعية ..



و المبانى آخر مقولة  
بكل ذوق و أدب .. رفعت "العلاقات" إيدها  
طلبت الكلمة من "القانون" فى المحكمة سيدها  
قالت "العلاقات" .. ليه يا جماعة العنف  
كل كتاب عاوز مصلحته يعرض كذا صنف  
صحيح هنلاقى إختلافات و فروق فردية  
بس لازم يكون للمشرف عليكم خلفية  
هنا قال "القانون" ..  
تؤجل القضية ..  
لما الكل يعرف حدودة الجلسة الجاية  
رفعت الجلسة .. رفعت الجلسة.

أمى ..

أمى بتوحشنى ..  
و الفكر يروشنى ..  
الست فايضة غنت لك  
و قالت لك ..  
(ست الحبايب)  
و أنا ..  
قلبى فى حبك دايب  
أسافر .. و أغيب  
و أرجع ..  
فى حضنك ..  
حبيب  
بتخففى همى ..  
فى دنيتى  
و لما أفرح تفرحى لى  
و بتكونى لى ..  
فرحتى  
صدق إالى قال ..  
إالى من غير أم ..  
حاله يغم ..  
و أنا حبى ليكى ..

روح و شریان .. و دم.  
الجنه تحت أقدامك  
أعيش العمر ..  
خدامك.  
و لو روحی ..  
تخفف آلامك  
ما تغلى علیکی .. یا أمی  
(یا أغلی من روحی و دمی)  
=محمد فهمی=

## تهيئة على الورق ..

من و إحنا صغار ..  
كنا ماشيين  
شوقنا لبكرة ..  
و الحنين ..  
بنقول للخطوة .. طموح  
مستقبل جاي .. مفتوح  
و الشارع ما بينتهيش.

يوم ورا يوم نكبر .. و إحنا  
ما عرفناش معنى المحنة  
إلا و كان ليها حل ..  
مكتوب على ورقة فى كتاب ..  
فى قلوب البشر من جوه  
و إحنا لا حول و لا قوه ..  
و الشارع ما بينتهيش.

لسه ماشيين ..  
و بنسند على جدار ..  
م التعب ..  
خبطنا على صاحب الدار

يتفتح الباب ..  
و طيف من بعيد يبشاور ..  
نمشى فى الضلام بالراحة  
و كنّا و كانت النهاية براحة  
و عرفنا إن الشارع ..  
هو حياتنا ... ..  
نوصل ... ..  
بتكون نهايتنا.



## المحتويات

٣	إهداء .....
٥	قالوا عن الشعر .....
٩	فاهم ولا مش فاهم .....
١١	حواديت القبور .....
١٣	راجع .....
١٥	حفنة نور .....
١٧	الشنطة الجلد .....
٢٠	إعدام ألم .....
٢١	الإنتخابات .....
٢٣	أنا مبحش .....
٢٦	الطرف الثالث .....
٢٨	ألوان .....
٣٠	الفارس .....
٣٧	تنهيدة .....
٣٩	إنتي مين؟ .....
٤٠	شارد .....
٤٢	طموح .....
٤٣	أنا المصري .....
٤٦	مؤال .....
٤٧	الكاشير .....
٤٩	حببتي يامصر .....

٥٠	..... الشاي .. (مؤال)
٥١	..... مطلوب القبض عليه
٥٢	..... فاكرة
٥٥	..... مش هاقولك
٥٧	..... لحظة فراق
٥٩	..... سنين العمر
٦١	..... بريد الأحبة
٦٤	..... باكتب لك
٦٦	..... رغم الحب
٦٨	..... حكاية محكمة تجارية
٧٤	..... أمي
٧٦	..... تهبيسة على الورق
٧٩	..... المحتويات